



PÓST- OG FJARSKIPTASTOFNUN

Ákvörðun nr. 21/2016

Afturköllun á tíðniheimild iCell ehf. á 3,5 GHz tíðnisviði.

I.

Boðun ákvörðunar

Með bréfi, dags. 16. nóvember 2016, boðaði Póst- og fjarskiptastofnun (PFS) að stofnunin hefði í hyggju að afturkalla heimild iCell ehf. til notkunar á tíðnum í 3,5 GHz tíðnisviðinu, vegna vanefnda á skilyrðum hennar. Um er að ræða heimild sem upphaflega var gefin út 1. desember 2011 til notkunar á tíðnisviðinu 3413,5-3427,5 og 3513,5-3527,5 MHz til reksturs háhraða aðgangsnets fyrir gagnaflutningsþjónustu. iCell ehf. gerði ekki athugasemdir við áform PFS og hefur stofnunin því tekið eftirfarandi ákvörðun í málinu.

II.

Málavextir

Þann 1. desember 2011 veitti PFS iCell ehf. heimild til notkunar á tíðnisviðinu 3413,5-3427,5 og 3513,5-3527,5 MHz til reksturs háhraða aðgangsnets fyrir gagnaflutningsþjónustu á Suðurlandi frá Selvogi að Eyjafjöllum. Heimild iCell ehf. var endurútgefin 26. júlí 2012 með þeirri breytingu að Borgarfjarðarsýslu var bætt við heimilað útbreiðslusvæði.

Þann 16. ágúst 2016, ákvað PFS að undangengnum lögbundnum aðvörunum að fella niður skráningu iCell ehf. sem fjarskiptafyrirtæki, vegna vanskila á rekstrargjaldi.

iCell ehf. hefur ekki greitt árgjöld fyrir tíðninotkun skv. 14. gr. a. laga um Póst- og fjarskiptastofnun nr. 69/2003 fyrir árin 2015 og 2016.

Allt bendir til þess að 3,5 GHz net iCell ehf. hafi ekki verið starfrækt um nokkurt skeið, a.m.k. frá síðustu áramótum.

Fyrirnefnt bréf PFS um fyrirhugaða ákvörðun, var póstsent og sent í tölvupósti til fyrirvarsmanns félagsins 16. nóvember 2016. Samdægurs barst svar í tölvupósti frá fyrirvarsmanninum þar sem fram kom að félagið féllist á afturköllun tíðniheimildarinnar. Önnur svör hafa ekki borist frá félaginu.

II.

Forsendur og niðurstaða

iCell ehf. uppfyllir ekki lengur skilyrði sem sett voru í tíðniheimildinni. Samkvæmt 1. gr. heimildarinnar var hún veitt til reksturs ákveðinnar tegundar almennrar fjarskiptaþjónustu. Þar sem skráning iCell ehf. sem fjarskiptafyrirtæki hefur verið felld niður er fyrirtækinu ekki lengur heimilt að bjóða slíka þjónustu og eru því forsendur fyrir útgáfu leyfisins brostnar.

Samkvæmt 2. gr. heimildarinnar er gert ráð fyrir að starfsemi nets hefjist innan 6 mánaða frá útgáfu þess og að starfsemin leggist ekki af lengur en í 6 mánuði samfellt. Engin starfsemi hefur verið hjá félaginu um nokkurt skeið, eða a.m.k. frá 31. desember 2015.

Samkvæmt 9. gr. sbr. 10. gr. heimildarinnar getur PFS afturkallað heimildina ef ekki er staðið í skilum með gjöld til PFS. Síðast liðin 2 ár hefur iCell ehf. ekki greitt lögboðin rekstrargjöld og tíðnigjöld skv. lögum um Póst- og fjarskiptastofnun nr. 69/2003.

Samkvæmt 5. mgr. 74. gr. laga um fjarskipti nr. 81/2003 getur PFS afturkallað tíðniréttindi ef ekki er farið eftir viðkomandi lagaákvæðum eða skilyrðum heimildar. Samkvæmt 73. gr. skal, áður en til afturköllunar kemur gefa viðkomandi fyrirtæki tækifæri til að koma skoðun sinni á framfæri eða lagfæra brot sitt innan eins mánaðar. PFS gaf iCell hf. tækifæri til þess að andmæla eða bæta úr vanefndum innan tilskilins frests. Í framhaldi af því lýsti félagið því yfir að það féllist á afturköllun tíðniheimildarinnar.

Ákvörðunarorð

Með vísan til 5. mgr. 74. gr. laga um fjarskipti nr. 81/2003 afturkallar Póst- og fjarskiptastofnun hér með heimild iCell ehf. til notkunar á tíðnisviðinu 3413,5-3427,5 og 3513,5-3527,5 MHz til reksturs háhraða aðgangsnets fyrir gagnaflutningsþjónustu á Suðurlandi frá Selvogi að Eyjafjöllum og í Borgarfjarðarsýslu, sem upphaflega var útgefin 1. desember 2011 og endurútgefin 26. júlí 2012.

Ákvörðun þessi er kæránleg til úrskurðarnefndar fjarskipta- og póstmála, sbr. 13. gr. laga nr. 69/2003, um Póst- og fjarskiptastofnun. Kæran skal berast úrskurðarnefnd innan fjögurra vikna frá því viðkomandi var kunnugt um ákvörðun Póst- og fjarskiptastofnunar. Um kostnað vegna málskots fer samkvæmt 5. mgr. 13. gr. sömu laga, auk þess sem greiða ber sérstakt málskotsgjald að upphæð kr. 150.000, skv. 6. gr. reglugerðar nr. 36/2009 um úrskurðarnefnd fjarskipta- og póstmál.

Reykjavík, 20. desember 2016

Hrafnkell V. Gíslason

Sigurjón Ingvason